

海陽縣志

元



海陽縣志
卷之二

海陽縣誌序

讀史者不渺思微會而以記憶
稱博雅是謂書厨作史者不真
知灼見而以勦襲矜富有是謂
獺祭二者泛而不親與圍而無
用皆非經世學也然則古之名

史如漢之司馬遷班固晉之徐
廣唐之劉知幾吳兢諸公必巡
行列國目擊閭閻而後登諸史
冊其車轍馬跡何不憚煩雖然
治統昭乎史文獻徵乎志志史
之流也故披覽臧方褒誅筆削

太史之事也而入國問俗稅駕
桑田周知疾苦與斯民寤寐相
往來者良有司之職也所以國
有史省有志而郡而縣亦例有
紀乘邑乘之得失關乎異日之
輶軒可不慎歟海陽舊爲大嵩

衛雍正十三年請裁四衛等事
蒙

皇上錫以嘉名屏茲東服事皆創始
百務棼如前任高公建造衙署
倉庫而外正在次第舉行旋以
擢去予於乾隆四年二月調任

茲邑蒞事之後正憂山國民貧
鹵邦地瘠而城垣傾圯海濤夜
驚

聖廟陔墜觀瞻不肅其他應行事件
案不勝稽更可矜者五方配發
之犯言語不同鳩形鵠面罔不

沁沁覘覘以待命於邑宰衛裁
則隸併縣例固然也顧海陽藁
爾彈丸居民且憂乏食其堪此
外方游手者寔繁有徒耶余唯
是勵精淬神夙夜匪懈權其緩
急先後自四年八月修理城垣

越次年告竣而封守固矣旋卽
修葺

文廟雖不能鼎新而增復古制學校
安矣議詳買補穀一萬石而積
儲備矣因爲援例請給軍犯口
糧蒙

大中丞 奏請奉

旨俞允復又捐建棲流所而流民定
矣又於欽奉

上諭巡歷村庄案內周行村落問民
疾苦因得遍歷群峰遐瞻巨浸
考其來龍歸宿之處稽其屏藩

扼要之區凡所謂山川雲物都鄙市廛物產民情罔不逐時記載真知而灼見矣又因要地必需巡防詳建小紀營房墩臺而烽警有備邊防無虞矣凡此皆荷

各上憲策勵駑駘以時督率俾予得從容辦理無致覆餗一日者

大中丞有令凡在郡縣各誌舊有者續編新設者創始寔力奉行毋徒文飾余奉令之下仰見

名公卿采風問俗下察民情痾瘵
在抱之至意因思縣志所載戶
口田賦其最重也去歲適當編
審戶口清釐現在

奏請至於田賦則予三年來推收
徵比有荒必除有墾必陞歲歲

全完現邀議叙者也星野輿圖
則史冊可稽山川風俗則巡行
已到城垣壇壝則畚鍤方休倉
庾積儲則報完有數物產詢之
土人科貢諮之秉鐸而唯忠孝
節義之事奏疏記序之文一時

未能詳盡用是進邑之縉紳士
子而諏之唯時士大夫莫不奮
興文教廣爲搜羅不渝月而成
帙粵稽古來史館莫盛於唐之
直史而韋述柳芳等亦必七年
而始成呂夷簡益以三朝更復


需以時日搜羅記載原非猝時
可辦也雖然予之修志也奉令
在辛酉臘月而躬親閱歷已始
於己未仲春迄今已三載矣夫
亦何依何違而故爲遷延歲月
哉書成分列牙籤上呈

大中丞其間疎略之處所在正多
一承 大匠斧斯自可信今傳
後予不敏不敢附於唐宋諸儒
編年紀事之末而如日記憶勦
襲則庶幾免矣是爲序

乾隆七年歲次壬戌仲春望日穀旦

賜進士出身文林郎知山東登州府
海陽縣事前知武定府蒲臺縣
事戊午科鄉試同考官紀錄二
次記功一次包桂題於鳳臺官

舍



卷之七

藝文

藝文

藝文

卷之八

藝文

版

海陽縣誌

目次

二

海陽縣誌卷之一



修志姓氏

賜進士出身文林郎山東登州府海陽縣知縣紀錄二次包 桂纂修

海陽縣監生考授州判趙振第

海陽縣貢生趙翕宗

海陽縣廩監生李承寵

海陽縣監生修永齡

海陽縣學廩生李承瑞

海陽縣學生員趙之泉

海陽縣誌

卷之一

修志姓氏

一

海陽縣學生員趙基

海陽縣儒童李承恕

海陽縣儒童李承進

海陽縣儒童李承美

浙江杭州府仁和縣學生員張振河

浙江杭州府錢塘縣附監生包焯

浙江杭州府錢塘縣監生包熾

浙江杭州府錢塘縣監生包煒校對

海陽縣兵房典史孫維補

海陽縣兵房典
吏史紹經
海陽縣承發科典
吏孫作義
臚錄

海陽縣誌

卷之一

修志姓氏

凡例

一誌以傳信且以經世一切浮光掠影之事俱不敢載且字斟句酌斬于醇正凡怪誕險仄之語非唯有關風化抑恐貽笑大方

一縣中原無舊志近奉 憲檄纂修故訪求時事博採先型盡其見聞所及以爲草創其間闕畧頗多甚有望於後之討論

一誌屬外史務求繁簡得宜如賦役已有全書不妨僅綜其要風俗同於他邑何敢別炫其奇

海陽縣誌

卷之一

凡例

三

一職官之載凡以官之有職于茲土也海陽設于雍正十三年則未分縣以前均係衛官不係衛官卽係萊陽官寧海官俱與本縣無涉故不具載

一職官於未分縣前旣不具載則凡人物科貢忠孝節義凡十三年前者亦應不載雖然官以縣名故有縣斯有官事以地徵故有地卽有事譬如十三年後之忠義錄之而前此者弗與是錄其子孫而遺其宗祖也况死者之坟墓現入海陽之版圖乎是焉可不錄

一他集所有而茲集所無者如陵寢官室宦蹟實錄
其事何敢點綴以飾觀他志所無而茲集獨有者
如鹽法海運積儲實有其事何可疎忽以遺漏
一節孝自分縣以來奉

旨旌表者僅八人耳集中所載浮於茲額非敢濫觴以
示惠蓋緣海濱僻處愚民無知有不知定例而不
請

旌者有子孫外出或絕嗣而不請

旌者或有單寒孤苦爲衿士所不知搜羅所不及而

海陽縣誌

卷之一

凡例

四

不請

旌者若一槩抹煞無以慰孤魂于地下表而出之以
見善善欲長之意

一海陽新設小邑無駐劄大臣無當事顯要故一切
奏疏條議不能多得而風花雪月之詩又無足取故
於傳記銘表搜羅一二亦無非表宅式廬之意

一藝文中必本地人言本地事則寥寥一二青竹減
色故有他邑人而言海陽事或海陽人而言他處
事者均載入

海陽縣誌分類次第說

洪範九疇之有次也義經禘卦之有序也然則邑乘事
棼而類異亦有序乎亦有說乎曰有爲治者莫重於民
事民事所在而先驗之天何也豳風之詩曰七月流火
九月授衣周禮辰角見而雨畢天根見而水涸駟見而
隕霜火見而戒寒蓋以節氣之早晚躔次之後先而爲
興事力作之候故志書首星野焉然仰觀於天者猶必
俯察乎地天之星辰不由人轉移地之繡壤則隨時封
建星不變而野有變故沿革次之既有沿革則當爲之

海陽縣誌

卷之一

分類次第說

六

奠山川釐版圖分保甲立市廛故疆域形勝山川都鄙
又次之然而封域之內有時鳳噦麟遊有時石言神降
錫之休而垂之戒皆天時地利之所時有也故災異次
之由是而稽民事司民則獻籍也司農則正供也太師
則陳風也太史則納賈也故戶口田賦風俗物產又次
之田事旣飭農乃不惑通商惠賈關市毋索故鹽法海
運次之如是者民生厚矣民行未興可奈何故學校次
之六府孔修彝倫攸敘而後力役興衛民者有城池居
官者有公署蓋藏者有倉廩傳羽者有舖舍濟貧柔遠

者有院有所型方勵俗者有祠有坊或經營或脩葺而皆得以建置該焉故建置次之由是先成民而後致力於神祈年報饗歲時伏臘故祀典又次之有時輶車戾止君言不宿故驛遞次之雖然此言其常也未言其變一旦天災流行小醜竊發將何恃以無恐故積儲兵備次之爾乃飭官常慎選舉重恩榮廣錫類故職官科貢封廕又次之興廉講讓式廬旌里忠孝節義王化之成故人物次之男女不可以無別故烈女又次之外紀者何非聖賢之教而別爲一端故外之然既外之又何以

列于藝文之前考藝文所載亦有咏歌勝景及揮毫梵字者故以藝文總天時地利人事物產之全而綜德行政事文學言語之綱也故以藝文終之書曰若網在綱有條不紊蒞斯邑者按序敷施化成久道毋徒作案牘觀也

海陽十景

高頂仙踪

邑東北四十里有山名菩薩頂張真人所居飛昇時以炭書詩八句于石風雨不壞至今尚在詩曰孤峯雲隱舊山堂遠寄萍踪到此鄉不願高車雲節擁可堪松蓋晚風涼南官行滿三千籙北院蒲團六月長今夜乘鸞歸海嶠碧桃開處姓名芳

龍山遠照

邑西三十里其山尖秀聳拔曲折蜿蜒狀如龍形山頂有石洞天橋諸景山中多異蛇土人呼為小龍每當七月間連晴數日於日晡時山形斜照城內樹影參差峯巒如繪

虎墩魚浦

浦在邑西南二里有石如虎適墩建此故名虎墩面臨海汶春夏間漁艇鱗集迷離來往直入畫圖明萬歷間村人夜常見虎時失牛羊捕之不得村人疑此石鑿其後肘而患息

嵩院藏經

院在邑北二十里四面環山層巒抱牖真有天竺冷泉之致院中有藏經均非吾儒所識且不記其來從

南門海市

海離城二里波瀾騰湧拍岸排空一遇南風如萬馬千軍鼓聲不絕又如雷聲隱隱晝夜喧闐春夏之交海市頻起山林城市變化萬千歷辰至巳或歷午至未蓬萊閣有此神奇而無此經久

奇峯虎踞

卷之一

海陽十景